

Augsburg, 30. März 1578

An [Georg am Wald]

Druck: Epithalamia quorundam doctissimorum virorum in honorem Georgii am Wald,
Augsburg 1578, fol. A2r.

S. Pudet me, sterilitatem et imbecillitatem ingenij mei considerantem, quicquam scribere, quod extra scholae grammaticae fines euagetur. In ea enim palaestra diuturnus vsus paulò exercitatiorem, et proinde audaciorem etiam me fecit. Sed cum ad alia vocor: Frigidus obsistit circum praecordia sanguis: adeò, vt quicquid vel dico vel scribo vel facio, mihi ipsi vehementer displiceat. Quò aequiore animo ab alijs ea et improbari et rideri, ferre debeo. Prudentius esset, γνωστιμαχεῖν, et desistere potius (vt monet Quintilianus) quam deficere. Sed voluntati tuae, Clarissime D. Doctor, amice colende, cum repugnare neque debeam neque possim (nisi ingratii animi crimen subire velim) pro nauata fideli opera, et preciosis medicamentis liberaliter adhibitis, paucos tuae praestantiae male tornatos et frigidos versus offero, de quibus statues quod videbitur, ea tamen conditione, si imprimendos curaturus es: vt extreum libelli angulum occupent. Vale. Augustae Vindelicorum. 3. Cal[endas] Aprilis.
Anno salutis 1578.